

Melihat daripada apa yang terjadi dan melihat perkembangan-perkembangan yang terbit daripada ucapan-ucapan itu telah menghidupkan pengharapan rakyat, terutama rakyat Malaysia, akan adanya perhubungan-perhubungan semula di antara Filipina dengan Malaysia. Tetapi setelah harapan-harapan yang penuh timbul yang terbitnya daripada ucapan-ucapan Perdana Menteri dan melihat kepada perkembangan yang ada sekarang, menunjukkan bahawa persetujuan itu belum masuk maka apa yang diharapkan itu sekarang telah menjadi jauh dan kerana perbuatan-perbuatan daripada ucapan-ucapan yang mungkin tidak difikirkan dengan semasak-masaknya maka kepercayaan rakyat daripada apa yang didengar dan dilihat mereka, di dalam masa menulis ini, menunjukkan bahawa keadaan hubungan itu makin jauh dan tidak mungkin akan menjadi segera.

Bagaimakah rakyat memandang kepada kedudukan seorang Perdana Menteri apabila mendengar ucapan-ucapan yang seakan-akan hubungan di antara kedua pihak itu menunggu saat dan mungkin sehari dua akan berlaku?

Sebab itu adalah ini menjadi pengajaran untuk ketenangan rakyat adalah kurang baik menghidupkan harapan-harapan dan pengharapan-pengharapan sahaja kepada rakyat. "Mulut Kamu Harimau Kamu" ialah perkataan Saiyidina 'Alī yang mengingatkan supaya berhati-hati di dalam memberi kata-kata terutamanya apabila yang berkata-kata itu seorang pemimpin yang agung.

* * *

Berhati-hatilah Bercakap Mengenai Agama

Baharu-baharu ini telah diadakan pilihan raya kecil di Kerian Laut, Perak, dan di dalam kempen pilihan raya itu yang bertanding hanya dua parti iaitu PAS dan Perikatan. Bagaimana bentuk dan cara pilihan raya dalam merebut kerusi untuk kedua-dua parti itu tidaklah menjadi satu persoalan tetapi yang menjadi persoalan ialah perkataan-perkataan yang digunakan di antara kedua

belah pihak. Pihak PAS mengeluarkan kata-kata di dalam pilihan raya itu, seakan-akan menunjukkan belang bahawa kalau PAS berkuasa mereka akan menghukum dahulu kepada Tengku Abdul Rahman sebagai Ketua Perikatan dan tentu juga yang lainnya iaitu mengadakan suatu cara yang belum pun lagi berkuasa telah menunjukkan corak kekuasaannya. Cara yang demikian tentulah tidak digemari oleh orang-orang yang tidak masuk mana-mana parti.

Tetapi sebaliknya ada pula di sebelah Perikatan yang mungkin tidak berniat hendak menyentuh perasaan orang-orang beragama Islam yang di luar daripada parti iaitu ucapan En. Mohamed Khir Johari. Beliau berkata bahawa PAS ialah parti yang sehabis tidak berguna di dalam negeri itu. Mereka, katanya, mencuba menyakiti lain-lain bangsa. Qur'an, katanya, tidak mengatakan bahawa orang-orang Islam tidak boleh berbaik-baik dan bersahabat dengan baik dengan orang yang bukan Islam. Tetapi katanya, PAS sentiasa berkata dan mengemukakan satu bangsa satu agama dan satu bahasa.

Kita tidak mencampuri persoalan adakah PAS itu buruk atau PAS itu baik. Tetapi satu perkara yang mungkin menarik perhatian umum bahawa di dalam ucapan En. Mohamed Khir Johari, Menteri Pelajaran Malaysia, ada menyatakan bahawa Qur'an tidak menegah berbaik-baik kepada orang-orang yang bukan Islam. Ini betul tetapi berbaik-baik macam mana? Berbaik-baik kepada satu-satu golongan yang bukan Islam memang disuruh kerana agama Islam itu bukan agama yang menggunakan kekuasaan dan kekerasan terhadap orang-orang yang bukan seagama dengannya. Berbaik-baik yang dikehendaki oleh Islam ialah selagi orang-orang yang bukan Islam itu tidak menyakiti mereka dan tidak menghalau keluar akan mereka tetapi jika ada riaknya yang mereka, sama ada dari segi ekonomi, segi siasah atau seumpamanya bertujuan, sama ada jangka pendek atau jangka panjang, menghalau mereka, maka berkewajipan bagi umat Islam tegak berdiri untuk mempertahankan daripada dilaku

yang sedemikian.

Ada pula timbul satu soal daripadanya bahawa dengan berbaik-baik itu, di antara kafir dengan Muslimin adalah tentang mana. Ini mesti dipelajari dan mesti dihalusi adakah kerana berbaik-baik itu, dikatakan supaya duduk bersama, duduk sama rendah berdiri sama tinggi lalu bersosial dengan bersatu di dalam meja arak, minum bersama-sama? Adakah dengan kerana berbaik-baik di antara kedua pihak itu sekadar-kadar yang tidak merosakkan kepada Islam sahaja? Ini perkara-perkara yang patut dikaji.

Yang lebih mendukacitakan lagi dalam ucapan En. Khir Johari, sungguhpun ia tidak berkenan kepada dasar-dasar PAS tetapi suatu perkara di dalam cita-cita PAS menghendaki suatu agama itu adalah satu pilihan tepat yang tidak akan ada seorang pun umat Islam yang beriman yang akan menolak pilihan itu. Islam tidak akan menduakan agamanya, Islam tidak akan menjadi syirik dan Islam tidak akan tunduk dan patuh kepada apa-apa jua pun yang akan bertentangan dengan hukum-hukum Islam. Dan bagi umat Islam adalah mesti patuh kepada seruan Allah. Ayat 19 surat Āli ‘Imrān yang berbunyi “*Inna al-dīnā inda Allāhi al-Islām*”, maksudnya “Sesungguhnya agama yang (sah) di sisi Allah ialah Islam.”

Begitulah agama Allah yang dibawa oleh nabi-nabi yang terdahulu daripada-Nya sehingga kepada Nabi Muhammad (S.A.W) menghendaki pengikut-pengikutnya menyerahkan kepada-Nya, kepada Allah *Subḥānahu wa Ta ‘ālā*, iaitu agama mereka mestilah agama Islam.

Bahkan Allah memberi pertunjuk dan memberi peringatan kepada tiap-tiap manusia dengan firman-Nya (maksudnya): “Dan barang siapa mencari (memilih) sesuatu agama lain daripada agama Islam, maka tidak akan diterima (agama itu) daripadanya, sedang ia di akhirat adalah seorang daripada mereka yang rugi.”

Adalah menghairankan bagaimana seorang Menteri

Pelajaran yang beragama Islam itu yang ia sendiri tidak dapat melakukan dan berbuat sebagaimana yang disuruh. Tegas Allah memerintahkan supaya agama Islam itulah agama yang dianut oleh tiap-tiap Islam dan oleh kerana itu apakah salahnya kalau PAS berkata bahawa satu agama iaitu satu agama Islam yang tunggal bagi perjuangannya dan bagi perjuangan seluruh umat Islam – bukan dimintanya kepada agama lain.

Agama yang dikehendaki dilaksanakan oleh seseorang Islam ialah agama yang meliputi segala perihal kehidupan sehari-hari yang sebatи dengan jiwa pemeluk-pemeluknya dan tidak berbelah bagi kepadanya apalagi menjadikan agama itu sebagai topeng perjuangannya – waktu beragama beramai-ramai sembahyang di masjid dan sudah habis istiadat agama beramai-ramai di atas botol arak, di atas minuman-minuman keras, berdansa-dansi melakukan perbuatan ‘āṣī yang ditegah oleh agama. Kalau ini terjadi sekalipun ada anggota-anggota PAS yang membuatnya tentunya wajib dilaknat.

Agama Islam hendaklah dijalankan dengan amal dan dilaksanakan dengan amal dan diwajibkan untuk menyebarkannya dengan cara lisan dan amal, bukan dengan hanya namanya sahaja beragama Islam.

Mata memandang – dengan pandangan-pandangan yang menyakitkan mata umat Islam – di telinga umat Islam terdengar dengan pendengaran-pendengaran yang menyakitkan perasaan umat Islam – hati yang manakah yang akan tahan yang akan dapat menutup mulutnya daripada membuat teguran-teguran kepada perbuatan-perbuatan yang bertentangan dengan agama Islam yang terbit dari pemeluknya itu sendiri?

Kalau umpamanya di dalam sesuatu golongan kerana ianya bukan daripada golongannya sendiri, ada orang yang anak-anaknya tidak dapat lulus di dalam meningkat ke sekolah-sekolah menengah lalu mengalihkan arah anaknya kepada sekolah agama –